

素

軒

集

素軒集卷之三

五言律詩

和秋日郊居雜言韻

山店人幽獨
他鄉憶故鄉
煙籠桂月白
露結楓霜
旅况憑詩遣
羈愁藉酒忘
功名當自競
何必恨更長
早過善欲關

耿耿天將曙
經行善欲關
聽猿啼錦樹
信馬度青山
行止非人定
歸期一悵間
寸心

主事重不憚路途難

正月廿一日遊圓通寺

淑氣融和日風輕雨乍晴山光含殿影鳥語悅人聲
古砌新生草危礧舊倚城老僧留靜坐煮茗話無生

玉案山居

好山名玉案瀟洒闢軒居洗去心中垢看來架上書
雲窓花影散竹徑鳥聲虛一榻紅塵外悠然樂有餘

立春日漫興

昨日殘冬盡今朝春意回嫩黃先着柳淡白已消梅
陽氣吹葭管椒漿泛玉盃笑談賓友樂寧嘆歲華催

喜捷

吾兄承父烈帶礪並山河問罪平交趾論功還伏波

群生無血刃大慘殮

天戈竹帛垂名後元勲在不磨

寄居掾史

別來經半載忽復又春深每動思君念何由慰我心
春花明候館初日耿遙岑近喜人來報

王師有捷音

春日漫興

遊覽乘閑日平原草色青花開明野館樹合暗津亭
夜思詩將釋春愁酒遂醒自知身是客泛泛似浮萍

題周憲使芝灑卷

題舍雖云炎希濂誠有佳草蓮歸意思風月蘊襟懷
殊泗源同出程朱道與偕拳拳能不已亦復到心齋

題周給事奉使招諭諸番東還圖

使星臨絕域萬里獨馳驅琛贊趨

京國山川入版圖班超今可擬博望復何殊歸奏

天顏喜聲名播九區

題周副使羨善齋卷

虞舜為韶樂宣尼昔所聞溫恭實玄德羨善匪虛文
堂取名何獨人維思不群懸知能好古于以挹清芬

送濮叅議

分手滇南道離亭酒一樽官程催驛騎戍邏接蠻村
雲度秦淮水山連白下門稽勲應有日重見拜

殊恩

梅雨

江干梅正熟絲雨拂簷楹未能消酷熱亦可助幽情
細細隨風落蕭蕭洒竹聲纖埃俱蕩盡詩思不勝清
和遜先生苦雨詩

山城連日雨何事得清幽路阻人難出川平水漫流
鷗鳴堪與狎泥潦可能休明日西風至頑雲捲盡不

和車軒閑中雜詠

日永高軒靜詩書正可攻遊魚翻藻上幽鳥嚦篁中
荷葉生新水楊花散碧空昨宵微雨歇吹到不寒風

送周副使

海宇清秋日南方使節歸霜威催葉落風力挾帆飛
要路避驄馬津亭迎繡衣送行俱悵望雲樹轉依微

和逯先生韻

芸窓秋色淨老樹響颺颺野外承清趣山中憶勝遊
蛩音連砌下鴈影落林陬入夜挑燈坐疎簾爽氣浮

和人韻

書齋半掩關靜坐愛清閑竹影移窓上蛩聲在壁間

風鳴庭外葉雲翳屋頭山萬里思親客征鞍何日還

和退先生韻

極目為幽尋秋高悅我心水光搖日影山色帶雲陰
樹上並黃鳥窓前啼翠禽望來詩興發遂爾有清吟

冬夜獨坐

挑燈深夜坐成鼓轉三更月色移窓上風聲入葉鳴
心勞思自拙志滿學無成應知情不擾底用悟無生

冬日詩得前字

風光將入臘氣候促殘年柳眼窺春早梅腮綻雪前
消愁仗卮酒陶性藉韋編韻險更相和情懷頓豁然

題清虛室

一室號清虛山中自隱居林霏穿戶牖空翠上衣裾
九轉丹求始三元氣本初塵埃與水月當共此心如

訪斗南和尚不遇

朝來仍入寺不遇老禪僧有偈留香案無生悟佛乘
螺峰青靄冷石洞碧泉澄自喜忘塵鞅飄然思不勝

臘日

年光逢臘日氣欲轉洪鈞岸柳先舒暖江梅已報春
磔雞傳往古觀蜡及茲辰最喜勞農後懽聲動四民

詠雪

朔風吹寒雪繚亂撲窓紗有態如飛絮無聲似落花
舟從清夜泛酒向六街賒謾說烹茶事遺風學士家

丁亥歲除夕

守歲當今夕光陰肯放過歲闌為戲少飲酒叙情多
笛弄梅花曲箏調白雪歌朝來換新暦天氣漸融和

永樂戊子元日立春

首歲初回律椒花頌太平東風先着柳暖日漸催鶯
海宇歡聲播人間淑氣生清時多慶澤吟咏極娛情

送周僉憲

考績辭官去迢遙上

玉京幕僚城下別候吏馬前迎彩旆搖搖見青驥靡靡行交游深旣久難述別離情

懷車軒

匆匆總叙別驛路漸荒涼有意投交友無由入醉鄉春光隨去馬月色照行裝二月當回首新醪待爾嘗

新燕

營巢將哺子雨過正泥融能應春秋社潛隨造化工花間迎麗日柳外受微風欲問烏衣國當時事已空

春遊

散步平原上清談有俊髦山村雲氣暗江店酒旗高

柳色和烟色緋桃間碧桃目前無限景隨處樂陶陶

駐馬龍華寺

散步入龍華秋清景物嘉殿遺三世佛園放四時花
祇有詩僧榻全無俗士車余心愈清淨煮茗對烟霞

暮秋即事

時值暮秋天農家盡穫田清風消宿雨旭日散朝烟
楓樹葉初赤丁香花尚鮮安居此禪室端可咏詩篇

早發蒙自縣宿倘甸驛

驛亭臨古道屋宇總蕭條旅况依然切離懷自此旣
林黃知橘柚園綠見芭蕉可憐殊方俗人家更寂寥

宿曲江驛浴溫泉

浴出溫泉裏氤氳暖氣多一身渾膩滑四體愈安和
細想通陰火微看湧翠波詠歸心自樂不厭重相過

和遠先生歲暮有述韻

信馬度長川因思節序遷風光得新歲人事失殘年
習禮遵遺典論經鄙太玄東君生意布花柳自芳妍

和人冬日漫興

軒中常獨坐佳客喜頻來地暖柳條發天晴杏蕊開
茶香生石鼎酒色灑瓊盃近得詩篇好吟看日幾回

除夜

春意明朝至年華此夜過試教開玉曆且共酌金波
竹色和烟重梅容映雪多豐年好光景客意莫蹉跎

初春遊寺

復值初春日清心謁梵宮荒村經小雨細麥受和風
柳已垂垂綠桃將冉冉紅歸時輕棹穩人在夕陽中

衡宇即事

化日已無邊書齋可自潛輕風寒剪剪細雨曉纖纖
喚交鶯穿柳啣泥燕入簾門前生意好滿地草芽尖

書齋即事

駘蕩春風起吹開草木花青帘鷗江館綠柳暗漁家

得句思無限觀棋趣有加書齋閑坐好時復閱南華

和車軒閑望韻

凝睇望晴川烟雲慘淡連鴉啼清曉樹花落暮春天
思索吟肩聳推敲句意圓光陰無限好不覺思陶然

和車軒先生述懷韻

愛靜樂無涯欣看鬢未華窓前風颶蝶檻內雨催花
已用詩言志何須酒作家呼童汲深井自起試新茶

雨

山氣蒸雲濕寒生雨欲來昏昏翳林木密密洒樓臺
只恐津難涉何妨詩重裁扁舟維柳岸共交且御杯

雨中即事

天末涼風起青山豁遠眸庭花堦下落園草雨中稠
轉樹雙黃鳥浮波一白鷗扁舟滇海上何必五湖遊
送張憲使

奉

命來南詔歸途雨乍晴好山迎綉轂芳樹引銀旌聲
譽馳遐域才能播

上京徘徊岐路側樽酒慰離情

和李僉憲韻

曉出津橋外風吹襟袖清日升林掩映霜落水澄明

驥馬馳官路青山擁郡城李侯如李白詩思滿前生

冬陰

早起朔風寒飢禽集樹端漁人移棹懶獵騎踏霜難
四野濃雲暗千林落葉殘毳袍重可衣酌酒更為懽

行次昆陽

朝來有行役騎馬到昆陽映日山光紫經霜草色黃
茫茫滇水濶去去旅途長佛寺深林裏樓臺出上方

激江宿彭將軍宅

故人留我宿欵曲叙交情美酒金杯勸新詩彩筆成
庭前松檜列屋後澗泉鳴誰似將軍達田園樂此生

題清溪罷釣

小艇泊溪畔，幽人罷釣歸。水雲同得趣，鷗鷺與忘機。
散步尋沙路，吟詩坐石磯。蘆花逗明月，皓色上緋衣。

柬遠先生

白日軒窓靜，鶯啼綠樹陰。幽居嘗茗味，高坐辨琴音。
不雨苗將旱，望雲天欲霖。何時舊遊處，飲子酒一杯。

送呂大參

有客朝

京去臨期為贈言，賓朋慵折柳。父老暮攀轅，明月人千里。青山酒一樽。

彤庭如到日准擬受榮

恩

和人詩韻

雨過槐陰綠清和景自嘉學飛梁上燕欲謝苑中花
性僻常耽酒神清每嗜茶平生亦疎懶殊不尚浮華

過寶曇寺

城居春欲暮乘興入山林頓起雲霞想惟聞鍾磬音
岩扉花寂寂苔逕竹森森老衲談空話端能悅我心

坐僧中庭房

靜坐幽窓下爐烟裊裊香竹風吹客袂松露滴禪床

詞客情偏好山僧趣自長安心吾已悟煩惱變清涼

筇竹寺贈玉峯老僧

昨宵微雨過出郭到山林竹露清吟思松風和梵音
已無塵雜慮獨有歲寒心人我俱忘却空門趣轉深

送周憲使

考滿例朝

覲行行萬里賒山程經六詔峽水下三巴月白猿聲
急風高鴈字斜不知從此去幾日到

京華

和退先生幽居詩韻

幽居已無事終日得清閑花影移窓外禽聲在樹間
陶情吟好句澹慮對青山我欲窮今古書齋每閉關

寄車軒先生

忽憶車軒叟書齋肯一過風前思態度月下想吟哦
杜酒知誰勸陶詩只自歌不知空館裏高興復如何

過靈香亭

公餘仍退食散步入靈香樹色園中綠苔痕石上蒼
清風歇團扇涼雨淨琴張首夏斯遊處清我興味長

和逮先生喜雨詩韻

炎蒸久不雨一雨即涼生枕簟偏能淨襟懷自是清

哦詩花下立適興竹間行滿眼添新意階前長決明

晚涼獨步

晚來微雨過散步在庭前衆鳥林間宿踈螢竹裏穿涼生風細細天淨月娟娟賞此多佳趣心清久不眠

贈立恒中

每日柴門掩云何老病生閑窓動詩思深院歇碁聲雨砌苔痕長月庭松影清知公有佳趣唯得自娛情

賦西林詩

坐如鶴不睡閑共雲無心白日回廊靜清風古院深扶筇來遠道披衲到西林我憶清吟處空階柿葉陰

和車軒自遣韻

靜坐幽窓下閑中佳思多清風能自至小雨忽然過
美酒須當飲新詩亦可哦眼前無俗事光景也由他
書齋即事

池塘初雨過水面貼新荷小燕穿青幕輕鷗泛碧波
窓前臨晉帖座上聽吳歌香醪拚一醉焉用說無何
東車軒

節候當芒種田家正務農微風牽荇帶清雨洗山容
筆底詩章麗樽中酒味濃與君傾一醉談咲喜相逢

遊太華寺

佛嚴古禪寺地僻遠人烟颯爽風簷竹清冷石竇泉碧天初過雨落日欲歸船此境俱相值令人思豁然

宿地龍屯

出門仍值雨晚宿地龍屯野曠人烟少雲開山色新正吟新句好稍喜濁醪醇卑舍皆茅覆安居任屈伸
贈僧財大用解制下山

山深良夜靜閑話葛藤禪茗啜石泉味爐焚柏子烟風清窓外竹月滿定中天喜爾來相謁題詩記徃年

宿曲靖分司

公館當長夏天晴雨氣收清風來樹杪斜日掛樓頭

靜把春秋閱惟將今古求閑登高阜立四望豁吟眸

正法寺僧房

惟愛僧房靜能消白日長窓晴花散影潭淨水生光
竹上詩人句爐中柏子香閑看時景好梅熟滿林黃

挽周中憲

逝矣周中憲悠悠動我思姓名遺憲府綱紀著清時
旅艤途應遠訃音家未知難忘交契舊哀挽謾成詩

登彌勒閣

寶閣俯清流開窓豁遠眸荷香風陣陣天碧水悠悠
得句欣尤捷娛情樂未休登臨無限景稍覺入新秋

和車軒聽琴詩

彈琴吾所好，稍下發清鏗。
隱隱高山調，泠泠流水聲。
真能消俗慮，信可樂浮生。
得趣陶元亮，無絃是有情。

和車軒華山夫詩

華山一道士，為我說全真。
豈獨不循理，尤兼大惑人。
孤憚思浪迹，左道欲謀身。
政事殊無此，丁寧告庶民。

秋夜坐

新秋方入夜，靜坐思悠然。
樹上風聲息，池中月影圓。
香仍焚小鼎，茗復煮清泉。
詩就聊長詠，焉能似往賢。

田人晚登李氏樓韻

登樓日將暮四顧覺沉冥夕照開岩谷晴烟起野坰
波光搖鳥白山色擁螺青好手誰能盡重教醉眼醒

遺興

天高氣初肅景物復何如適興過僧寺尋幽訪隱居
涼風吹燕雀秋水老芙蓉我固知如此吟詩自有舒
秋日過龍泉

登臨有佳趣偶爾到龍泉駐馬看山色觀魚傍水淵
寒花開的的晴蝶舞翩翩賞此無塵俗心神益暢然

偶成

禾黍清秋日江堤信馬行平蕪遙接郭疎柳半遮城

塞鴈雲間下風帆水上輕新詩聊以賦野望足閑情

坐常樂寺僧房

僧房宜靜坐坐久轉清幽絕却心中念俱成物外遊
園花秋寂寂澗水日悠悠老衲陪閑語呼童具茗甌

齋宿公堂

更漏初長夜星河欲轉時不眠情耿耿端坐思遲遲
竹影搖階月烏聲遠樹枝明朝躬上

表僚屬肅威儀

己丑歲八月十三日宿挹翠樓夜雨

蕭蕭零夜雨戶內嫩涼生高枕聽無寐空階滴有聲

林間木葉落窓外草蟲鳴起坐長吟罷依然對短檠
題僧立恒中安心齋卷

羨子空門學安心扁是齋山林真意趣風月好襟懷
問法無非理參玄亦有階既知俱是幻不必外形骸
對瓶中菊寄遠先生

坐愛窓間菊黃花間白花清幽香可賞中正色尤嘉
每嘆荆公句仍思靖節家重逢九日至咲挿一枝斜

東蓬居胡先生

風雨苦連日書齋長憶君窓間頻對竹戶外獨看雲
自得吟詩趣何妨酌酒醺明朝一相見與子重論文

九日寄車軒

九日滇南地東籬逸興催黃花衝雨放綠酒為君開
唉把茱萸挿欣將詩句裁留連光景好不必憶登臺
宿挹翠小樓

停燈耿不寐寂寂坐深更候鴈鳴秋渚寒砧搗戍城
良朋佳句興遊客故鄉情滴滴簷間雨新涼卧內生
霜天秋曉

雞聲斷遠近靈曜出東方霜重山楓赤秋高塞草黃
水邊亮散亂天際鴈翱翔遙憶征途客孤吟興自長

樓上

凭欄縱遠眸應喜在高樓四顧迥無際一時消盡愁
澤國風霜日山村禾黍秋孤帆來浦渺颺颺度中流
寄平松雨先生

十月滇南地梅開應小春魚書仍寄遠藻句為懷人
羨子才多邁慙余學未臻何時一相對共醉玉醪醇
和車軒詩韻

先生雖老邁詞賦尚風流夜永爐存火天寒身着裘
扶筇投古寺臨泛羨漁舟兩鬢皆成雪還能憶舊遊

賦花馬

駿骨非凡種傳來自渥洼雙蹄如削玉遍體若生花

不待王良顧應經伯樂誇雕鞍載公子豈比因鹽車

冬日和胡先生韻

陽復當冬至

恩光洽四夷寒梅將破臘瑞雪正當時萬國趨黃道

千官拜

赤墀邊庭無斥候叨寄在南維

宿陽宗縣

山行十餘里仍復到陽宗壠畝搖深麥溪山長大松
風光隨客騎春事動村農隔院居民住時來聽晚春

行次炒甸

朝來山郭靜樹木隱人家
裊娜垂堤柳芳菲夾道花
微風吹燕雀膏雨長桑麻
得句時堪詠悠然興轉嘉

新柳

江堤春雨過新柳自芳榮
舒眼先窺暖垂絲欲待鶯
當年陶令宅此日亞夫營
愛爾條柔弱留來贈遠行

春遊

荏苒春光好追遊遂此情
園紅蜂競集樹綠鳥和鳴
野岸寒冰解芳洲杜若生
放懷須極樂羨酒不辭傾

漫興

滇南春二月暖日麗長天
野徑飛蝴蝶村園叫杜鵑

花間睇湛露柳外散輕烟莫負光陰好娛情樂自然

和復齋胡先生遊寺詩韻

三春行樂處四體亦能舒轉使吟懷好何妨飲興餘
風微翻小燕波暖躍群魚寶地重來謁幽情與昔如

坐僧方田房

暇日登蘭若禪房暫一過松聲林外寂草色雨中多
古砌緣脩竹頽垣掛葛蘿上入僧臘長禪意近如何

暮春遣懷

槐院日初長營巢燕子忙風來花落片雨過草生香
信筆題新句邀朋酌巨觴閑臨流水上清思滿滄浪

太華寺夜坐

開軒乘夜坐不覺入深更熟與僧徒話全消幻俗情
風來林木振雲散月華明我意俱岑寂吟詩思頗清

遊崇聖寺

春和媚景明野寺適閒情啜茗探禪語開函闕歲經
拂花翻乳燕擲柳囀新鶯杖策臨奇石令人歡喜生

中秋寄憲副徐公

金氣已將半瑤空月正圓秋聲來樹杪桂影落樽前
自笑容顏老俄驚節序遷南樓多逸興莫負此嬋娟

奉別陳大參

客裏歲將新那堪別故人江山難數會詩酒且相親
雅操超流俗佳聲播遠民想應旋旆日花柳正芳春

寓新興

歲晚寓新興天寒客思增四山澄白月一榻對青燈
禮樂時方盛文章老未能生平殊懶散責善籍良朋

宿昆陽

曉起到昆陽冬深景漸長輕烟開野色初日動湖光
靜裏琴三弄閒來酒一觴故人雖咫尺翹首意茫茫

寄陳大參

旅泊借僧居清幽趣有餘談禪深悟道賞靜獨看書

野徑梅俱發官橋柳尚疎相逢驚歲晚不樂復何如

和胡祭酒春興四首

東風回煖律清興動閒吟白髮驚將老青陽喜又臨
芳林含宿雨晴野帶春陰廬阜多佳勝何時許共尋

又

幾日違清賞其如風景何猗蘭老空谷啼鳥隔烟蘿
雨露恩偏重田園趣亦多相思不相見歲月易蹉跎

又

地暖鶯偏早花遲氣尚寒東風輕杖屢芳味盛杯盤
世俗同誰論詩書每自看豈因耽野趣只恐又春殘

又

春來頻出郭景趣自怡然嘉樹村村綠名花處處妍
課童洗藥圃教子讀韋編滿眼皆生意扶筇過野田

寄陳大叅

晉寧分手後雲樹屢相思驛路看山處禪房聽雨時
逢人頻問訊寄遠謾裁詩僚窓多瞻仰歸程莫教遲
次陳大叅韻

去日花初發詩來笋又簪撫民經遠檄學佛寓名藍
鶴唳松間聽禪心石上參歸時更清暇對酒共高談

雨中寄郭仲彬

連朝時雨落泥潦滿堦除應阻遊人興無妨君子居

酒樽殊間澗詩句肯荒蹊知爾空齋裏焚香靜讀書

送朱孟端還臨安

滇城二月春花柳暗雲津把酒看青嶂臨流詠白蘋

亂峯新霽雨遠道獨歸人勉爾宜珍重高堂有老親

素軒集卷之四

五言律詩

行次安寧

行李安寧道風輕快玉驄草鋪平野綠花發映山紅
隱隱雲間樹依依水上蓬漁村經雨後景況似江東

聽鶯

日高晞湛露花下聽流鶯覩覩調新舌間關美妙聲
曉窓醒客夢午院助詩情此鳥曾知止三良怨未平

和車軒韻

晨起軒中坐身輕愛葛衣雲開山遠近天霽日光輝

花自春深減梅因雨後肥凭闌閒佇目靜數暮鴉歸

題日東僧大用所藏朱寅仲山水

扶桑日初上林樹映高岑恍見天邊色如聞澗下音
偶題聊適興獨對可娛心絰想揮名筆當時寓意深

書窓對雨

永日高齋坐開窓對雨時常臨脩禊帖熟讀詠懷詩
翠積苔痕厚紅消花樹裏琴書當自樂不必動遐思

和車軒詩韻

清晨讀道書至理亦無如縱飲情何限長吟思有餘
娛心開北牖散步下前除春草含生意青青滿野居

寄胡先生

自惜離群後相將一載餘閑情耽翰墨野興付樵漁
把鏡容顏改居夷禮法疎中秋明月下還憶對琴書

秋夜雨

踈雨滴深更偏令寐不成蘆花摧野岸梧葉墜山城
爽氣侵簾入寒聲徹夜清殊無羈旅况自得遂幽情

暮秋即事二首

景物初岑寂杪秋霜露寒園幽存晚菊溪近愛風湍
放曠懷陶令清高憶謝安行吟投古寺落日在江干

又

野迥秋陰潤風清露氣濃蕭蕭窗外竹歷歷澗邊松
適興吟新句尋幽覓舊踪晚來林下坐隔瞳聽村春

登大悲閣逢段澍先生

乘閒遊古寺林下振秋風石室松聲滿苔堦露氣濃
菊花存晚節鴈影落寒空詞客欣良晤悠悠然野興同
遊龍池與道者話

春日龍池上還多好鳥鳴風清花瓣落水暖荇絲輕
藥圃芝苗秀松亭鶴唳清散步苔堦下悠然物外情

遊慧光寺

清晨初過雨野寺曉鍾沉水暖魚翻藻風和鳥出林

哦詩忘俗慮煮茗沃塵心欲寫琴中趣何人為賞音

和蔣御史韻并謝松花之惠

松花真絕品服食可延年採擷經三月敷榮自九天
嘗隨仙仗下曾近日華邊遠致情應厚何殊萬里傳

夏日坐靈香亭

亭子極清幽軒窓爽氣浮竹深無酷暑雨霽似新秋
野景何冲曠閑情愛逗遙塵紛俱已寂清趣付輕鷗

即事

一雨除煩暑紗厨枕席清階前添竹色澗底落泉聲
書得鍾王趣詩懷陶謝名焚香窓下坐把筆述閑情

僧寺小池

野衲棲禪地白蓮開滿池靜涵新月影低拂老松枝
洗硯閣臨處携筇獨到時攢眉思入社為報遠公知

送段先生還臨安

山川清雨霽金氣應新秋旅鴈來天末寒蟬在樹頭
客懷殊落落詩思自悠悠不忍臨岐別停杯且暫留

雨中漫興二首

晚來殘雨過縱目上高樓不見雲中鴈惟多水上鷗
輕烟迷竹墅落日下林丘已有西成望離離櫂短稠

又

天際雲初散俄然風氣清晚蟬聲在樹裏柳色依城
嗜酒唯陶性耽詩豈為名有時佳思集隨意述閑情

送張愈憲考滿

張公名藉甚報政喜朝

京遠道青驄健長江畫鷁輕夷民懷令德察寡頌芳
聲春日長亭上那堪離別情

送劉參議考滿

送別之

京去河梁惜解携賢良逢

聖世名藉載金闈竦道春馳馬巴江曉聽鷗

大廷霑雨露餘惠及蒸黎

寄平松雨先生

澤國多零雨炎天晝亦涼荷香薰座榻竹色映琴堂
憶交傾金尊吟詩溢錦囊暮雲與春樹情思更何量

移舟採荇

移舟滄渚畔取荇趣偏長翠帶牽風細紫花含雨香
應宜淑女採不許野人將適意歸來晚輕帆掛夕陽

薰風

院宇當長夏蕭然清興多影搖堦下竹香泛沼中荷
可使炎威却能令景物和晚涼閑步處池水細生波

題袁菊莊卷

瀟洒雲間客，生平愛菊花。
已耽陶令趣，應羨屈平家。
美酒情偏洽，新詩興更賅。
南山佳氣在，千載起長嗟。

遊玉泉菴

賞春來野寺，且盡一時歡。
軒敞偏多景，羅輕尚薄寒。
好花迎繡旆，垂柳拂雕鞍。
緬憶蘭亭事，長歌重倚欄。

訪中庭

暇日出山城，尋僧遂野情。
春和幽鳥哢，風暖落花輕。
佳興因時適，迷心此處清。
光陰莫虛負，謾飲樂浮生。

重過太華寺

新春遂行樂喜遇上元時逕竹橫窓影園桃拂檻枝
風和鶯出谷水泮水流澌賸有登臨興何妨歸去遲
贈護維那

久為塵寰隔還來隱者居竹風孤枕冷松月半窓虛
杖錫看芝草焚香閱貝書煮茶延我坐不必論華胥
新槐

春暮雨初歇庭槐發嫩柯色黃猶淺淡陰綠未婆娑
偏稱流鶯囀還宜乳燕過晚來閑步處踈影拂晴波

寄適意道人

記得分携日俄驚春又闌每思遊賞際都在咲談間

灌足臨瀘水怡懷對判山刀圭能餌服真可駐童顏

雨中東菊莊

朝來雨初歇新綠滿槐庭濕潤松篁茂清滋蘭蕙馨
閑臨脩禊帖謾閱衛生經萬里無雲翳鈎簾山色青

贈試官

聖朝崇典禮又喜試秋闈多士稱才俊鴻儒更發揮
文光射奎璧詞賦吐珠璣燈下披黃卷應知道不違

寄朱寅仲

飲食今何似興居得自然丹青惟寓意藥石可延年
把菊懷吾友開樽憶徃賢清時應感舊目極判山顛

寄劉大參

綠樹布濃陰春徂夏又臨拂簷翻小燕隔葉轉佳禽
寄遠還題句相逢更盍簪滇南行樂處若箇是知音
丁未年除夕

守歲逢茲夕情懷復悵然慈親違建業遊子寓南滇
列炬驚栖鳥開樽集衆賢更深殊不寐明日又新年

遊圓照寺

春來山寺裏風景自清幽竹影移禪榻花香落茗甌
漆園情已識蓮社興當酬從此生歡喜歸來信紫駒

端午寄胡指揮

殊方當仲夏節序又端陽酒泛蒲苜綠門懸艾葉香
懷人情更切感舊思偏長屢賦新詩句憑誰寄永昌

寄陳大叅

分携還記得倏爾又中秋有約同看月無緣獨舉甌
詩書猶未達歲月去如流寄與知音者情懷莫悵惆

喜雪偶成柬陳叅政

天上彤雲布空中瑞雪垂麥苗敷迥野梅蕊綻竦枝
細酌黨家酒清吟杜甫詩年豐應有兆聊寫報相知

梅花

南詔春回早梅花雪後芳高枝呈素艷小朵弄新粧

每愛臨池影猶矜拂袂香夜深聞笛處坐對月昏黃

除夕

守歲當茲夕朋簪盍燕居生盆燃院落爆竹響街衢
對酒慚無量吟詩興有餘明朝過五十不飲竟何如

寄朱紳

年華何迅速滇海又逢春漸覺容顏老應知物候新
梅花初餞臘柳眼欲窺人寄與瀘江客尋芳莫厭頻

寄平宣

都門云別後三載易星霜洗耳琴聲曠懷人詩思長
簾虛山色淨坐近水花香萬里遙相憶能無寄八行

九日寄郭文陳謙

殊方逢九日，感物動遐思。
莫負登高趣，聊題逸興詩。
樽開醕醕酒，手把菊花枝。
故交重相見，俄驚鬢有絲。

寄陳大叅

執別河梁後，無由問起居。
相違千里道，不見一行書。
野館梅初發，津亭柳欲舒。
殊方饒瘴癘，餌藥近何如。

閑居寄陳大叅

閑居隨所適，奕罷又琴書。
靜賞心偏逸，幽探興有餘。
雲山蕭寺遠，夜月竹窓虛。
因憶陳夫子，別來音問疏。

寄郭居二秀才

梅子欲黃時朝來雨散絲闌山千里隔雲樹幾回思
嫩竹含新籜圓荷泛綠漪因將眼前趣寫作寄人詩

寄陳大叅

滇南分手後不覺值深秋輒轉思三益言歸老一丘
菊花荒院落蘆雪滿汀洲近有魚書至鼓盆歌未休

寄徐憲副

美人別我久各在天一方伐木詩空誦停雲思更長
炎荒無過鴈旅邸有啼蠻幾度登樓望青山又夕陽

次萬縣

舟行連日雨今夕喜新晴月色涵江郭入烟接郡城

斷猿聽不厭孤嶂晝難成隔岸漁家住孤燈點點明

泊巴東縣

巴江水初落正是泊舟時洗盞閑掌茗挑燈謾奕棋
漁人歸遠浦宿鳥集深枝客路多清事能無一賦詩

泊枝江

日落江天晚維舟近野汀蘆花爭吐白柳葉尚含青
隔岸明漁火依山聳驛亭掀蓬閑坐久空碧烟疎星

泊沙市有懷

夜泊荆江上令人動遠思船頭浪初靜天外月來遲
沙市明燈火漁舟欸鈞絲聯翩征鴈過不見寄新詩

泊調絃驛

晚宿調絃港
霜天夜氣清
荻花風細細
月色水盈盈
客舍高低樹
漁歌欸乃聲
興來揮彩筆
聊寫一時情

城陵磯阻風

冬月如春煖
湘江水未平
天邊青嶂小
波上白鷗輕
佳茗閑同啜
新詩喜共賡
狂風連日夜
遠客若為情

泊石頭口驛

天寒霜乍落
沙淺水痕收
紅樹林邊驛
夕陽江上舟
捕魚人晒網
聞鴈客登樓
此景堪圖畫
閑看興趣優

宿巴河

北風寒始急今夜宿巴河近渚見漁火隔溪聞棹歌
一封鄉信遠萬里客情多剪燭坐來久圍棋却睡魔

小孤山

絕頂窺彭澤高厓控海門鬼神司造化今古拱乾坤
野曠高低樹江平遠近村登臨無限意掃席倒芳樽

過高郵湖二首

僕楫平湖上朔風天正寒輕鷗浮水面旅鴈下雲端
動靜誰能達詩書好自看我家居建業回首路漫漫

又

歲晚過高郵風狂阻客舟天空湖水濶野迥嶺雲收

古岸人家少荒洲魚鳥稠何能解簪綾放浪此中遊

寄陳孟顥

記得

都門別于今六載餘琴書甘晚節山水樂閑居投轄
非耽酒臨淵豈羨魚相思天萬里况復鴈來踈

淮安至日

至日山陽縣其如情思何瞻雲親舍遠投館客懷多
小酌清樽酒高吟白雪歌途中光景易歲月逝頽波

彭城送別

分手彭城下趨

朝不可留星河明客棹鼓角動譙樓旅鴈依荒浦寒
水走激流一杯從此別情思兩悠悠

過荆門閘

向曉過荆門花明遠近村驚湍喧客耳春色慰吟塊
風俗那堪問人情詎足論舟行無以遣強自倒芳樽
過金線闌

春事相將半舟行泝上流檢書消永日命酒遣閑愁
空裏一歸鴈沙邊雙白鷗東風情太薄吹雪上人頭

次彭城

春朝微雨晴放溜過彭城水漲河流急風和燕子輕

客中人事異靜裏歲時更自是歸心切慵聞杜宇聲

過楊柳青

迢遞

京畿路融和春半天山川殊富麗花柳更芳妍伐鼓催歸棹揮毫續短篇憑高舵樓上吟罷思悠然

磚河舟中遇雪

同雲四野合大地雪花飛林下迷樵徑溪邊失釣磯
有腴滋壠麥無力拂征衣獨坐推蓬久殘鴉數點歸

竹深處為郭九揮使賦

高人性愛竹深處結軒居坐挹清風細吟看翠影虛

蒼苔隨杖屢明月對琴書剩得閑中趣翛然樂有餘

泊清浪道中

行舟當暑月天氣極炎蒸厭聽蟬喧耳惟看猿掛藤
無由得清景思欲踏層冰晚向江頭坐波光映玉繩

次辰陽有感

彩舟浮十日歸旆到辰陽江水綠於染野芳幽更香
解衣因苦熱揮扇較生涼南詔雖云遠于今載職方

宿打牛坪

晨征過樣備晚宿打牛坪路險人還陟梁危馬不驚
村園聞布谷畎畝見農耕此去惟柔遠詩書寓客情

次永平

僕從趣行李懷柔之永平遠山青列嶂高柳綠依城
春晚鶯花老嵐消瘴癘清推心惟格物知止自爲情

寄居廣

別後殊相憶窮經與校書筆花能夢不琴操亦何如
遠客情懷好故人音問疎新詩聊寫寄明月又盈虛

寄陳謙

旅館復棲遲令人有所思微風輕燕子驟雨落花枝
排悶開春酒娛懷誦逸詩開來隨處樂窓下看圍棋

梅花詩寄劉大參

檻外梅花樹當時手自栽臨池清影瘦拂袂暗香來
向暖窺春早凌寒映雪開調羹惟爾實莫使委蒼苔

過勝備驛

紫紆山路險溪上跨危梁綠水緣溪備青雲入點蒼
異鄉歸思迫旅寓客懷長草樹何蕃蘚交蒸不可當

過打牛坪遇雨

候館當春暮俄然風雨來應能清瘴癘已見沒塵埃
野墅啼鵑切征途客騎回凭高聊送目新綠滿池臺

寄段教授

蚤歲曾簪筆

金門籍姓名青袍仍教職皓首尚窮經不憚驅馳力
惟言繾綣情芳樽有美酒旅館更誰傾

寄陳方伯

別後經旬日相思夢幾回詩篇閑處寫藥裹病中開
顧我淹征旆逢人寄遠梅邊城明月夜東望重徘徊

寄徐憲副三首

客館晝荒涼娛懷藉酒觴烟嵐分坐榻山水入詩囊
故友情何重新緘墨尚香行裝隨處樂不覺在殊方

又

寂寞殊方客終朝憶故人山深征鴈斷溪暖早梅新

地僻交游少更長夢寐頻何時滇海上聯纏賞芳春

又

冬日之威楚光陰近一陽夷民偕樂業禾黍盡登場
地暖梅花白霜寒木葉黃緬思文墨暇誰與共壺觴

寄居阮二生

一別滇城後天寒冬又深客窓聊拾句公館靜鳴琴
隱隱山橫野蕭蕭葉滿林遙知讀書暇盃酒謾同斟
次韻徐憲副冬日見寄二首

雪消寒氣盡日出瘴烟開古調梅花曲新春竹葉杯
一陽將暖至千里寄書來早晚應相見琴樽日日陪

又

天空平野闊初日照旌旗雪後渾無瘴水消尚有漸
金樽開觴醞皓齒度新詞未卜同清賞難忘歲晚期

寄陳方伯

客寓沮西地又逢冬暮時有詩長見寄無日不相思
白褪梅花雪青歸楊柳枝春風滿滇海重與話襟期

寄郭仲彬

相違逾十日行李近如何野店寒梅早山村落葉多
深杯時酩酊佳句自吟哦客路殊清致那知歲月過

寄居阮二生

客館多清暇琴樽日日懽東風將布煖臘雪尚餘寒漸覺頭顱改俄驚歲事閑杏花牆外發獨自倚欄看

又

今夕值元宵山村景寂寥芳樽聊獨酌松炬謾高燒無寐衆喧息有懷千里遙滇城當此際燈月照笙蕭

次楚塲

芳春天氣和征旆駐岩阿高柳含清旭天桃映淺波山林人事少詩酒客情多緬想書堂裏諸生近若何

駐苦牙營

異域春將半東風鳥亂啼烟嵐開古戍花柳暗蠻溪

山秀愜人意原平快馬蹄巡行遍郊野不覺夕陽西

寄陳方伯

久客炎荒地芳春已半過別離徒問訊調養復如何
原上花枝少池邊草色多清明佳節近行樂竟蹉跎

寄徐憲副

滇陽春正好遊賞負佳期山水一千里鶯花二月時
柳營風淡淡栢府日遲遲無情囊中句傳來慰遠思

宿永慶寺

旅宿依蘭若悠然契夙心禪堂閒白晝佛屋翳芳林
候鳥鳴還歇春雲霽復陰獨憐方外客終日對高岑

雪

四野彤雲合隨風片片來須臾銀布地頃刻玉成堆
三白偏宜麥孤芳獨見梅新年有嘉瑞莫惜醉金盃

寄居阮二生

駐馬葉榆澤天寒歲暮時蒼山繞白雪汨水澹清漪
柳色回南陌梅花放北枝登臨有佳興寄遠賦新詩

螳川

信馬到螳川芳春景更妍梨花嬌殢雨柳葉綠垂烟
感興題新句醉歌記昔年客中隨所樂散步浴溫泉

沙籠村

晨征止何處村店次沙籠宿食俱隨意行歲任轉蓬
雨滋蘚草綠日暖杏花紅民俗雖殊異春光到處同

羅次縣

朝行逾百里不覺陟長途詩話憑誰論村醪為我沾
山川殊險異客邸且歡娛對此情懷好蕭然一事無

次徐憲副寄陳大參韻

宦遊三月久使節幾時還灑翰臨名帖開樽對碧山
龍韜子未解仙桂子能攀綰想儀容美應知意趣閒

寄徐憲副

翹首望金滄雲山路渺茫江楓明夕照蘿菊綻重陽

旅館敲詩句烏臺肅典華歸來談笑際新酒醉華觴

九日

此日逢重九東籬菊又黃光陰從代謝詩酒且踈狂
鴈陣拖秋色湖光蕩夕陽登臨懷往事無柰鬢毛蒼

寄陳大參

城西分手後倏忽又初冬霜老千村樹風清萬壑松
經綸心最切吟咏興尤濃幾度相思夜月明山寺鍾

冬至

殊方逢至日地底一陽回堤緩將舒柳山寒未放梅
客情嗟潦倒流景苦相催遙憶平生友無由共一杯

次沙甸

客路經沙甸夷居盡草樓殘紅點芳逕新綠漲春流
麥隴飛山雉桑林喚野鳩殊方風物異近喜似中州

寄胡榦軒

永昌千里外風景近如何綠樹鶯聲老青春客思多
看山聊適興對酒且當歌塵事無紛擾安居養泰和

雨中有懷寄陳大叅二首

獨坐書窓下天風送雨來白添湖上水綠長逕邊苔
適興琴三弄消閒酒一杯故人蕭寺裏車馬幾時回

又

一雨連朝夕池塘水又生映階新竹色聒耳亂蛙聲
靜裏耽詩句閒中樂道情遙思林下客襟抱不勝清

次張參議詩韻

政簡薇垣靜襟懷樂自如高談霏玉屑佳茗煮雲腴
香篆芸窓淨琴聲竹屋虛時時有新句為我寄幽居
閑中寄陳大參二首

一雨滌塵埃書窓盡日開墨花浮硯沼竹色上琴臺
佳句時時得清風細細來故人不我會此際獨徘徊

又

靜悟無生理深探造化工身心皆夢幻天地一樊籠

幽鳥棲芳樹殘花落晚風澹然忘物我何必更談空

和張參議謝果詩韻

涼風起高樹庭院雨初乾竹簾無炎暑繡衣有嫩寒
道明心自樂政簡量尤寬寄我新詩句才華亞柳韓

素軒集卷之四